

WANG SEBAGAI AMANAH TUHAN

Ujian kepercayaan yang sangat penting



Dr. Ng Kee Chuan

Wang Sebagai Amanah Tuhan

Siri Pemuridan Praktikal Projek DamAI (Jilid 2)

WANG SEBAGAI AMANAH TUHAN

Ujian kepercayaan yang sangat
penting

Oleh:

Dr. Ng Kee Chuan



Wang Sebagai Amanah Tuhan

WANG SEBAGAI AMANAH TUHAN:

Ujian kepercayaan yang sangat penting

(Siri Pemuridan Praktikal Projek DamAI Jilid 2)

Ditulis oleh:

Ng Kee Chuan

Tarikh Terbitan Pertama: Februari 2021

Diterbit oleh:

Ng Kee Chuan

Kota Kinabalu, Sabah

e-ISBN: 978-967-2802-28-0

Hak cipta © ngkeechuan@gmail.com

Petikan Alkitab diambil dari:

Alkitab Versi Borneo © 2016

Borneo Sabda Limited

Hak Cipta Terpelihara. Tidak dibenarkan mengeluar ulang mana-mana bahagian artikel, ilustrasi, dan isi kandungan buku ini dalam apa juga bentuk dan dengan cara apa jua sama ada elektronik, menyalin semula, mekanik, rakaman atau cara lain sebelum mendapat izin bertulis daripada Penerbit.

Kulit Buku: Semua gambar daripada Unsplash dan Pixabay.

Demi Kesejahteraan Jemaah Tuhan Yesus.

Lakukan segala kerja dengan sebulat hatimu untuk Tuhan, bukan untuk manusia, kerana kamu tahu bahawa daripada Tuhan kamu akan menerima warisan sebagai ganjaranmu. Kristus ialah Tuanmu dan kamu hamba-Nya. (Kolose 3:23-24)

Wang Sebagai Amanah Tuhan

Isi Kandungan

| | |
|--|-----------|
| Pendahuluan | 4 |
| 1.0 Prinsip-Prinsip Alkitabiah Untuk Menguruskan Wang | 6 |
| 1.1 Prinsip Melaksanakan Amanah Tuhan | 6 |
| 1.2 Prinsip Memberi Dengan Murah Hati | 7 |
| 2. Jerat-Jerat Kewangan Yang Perlu Dielak | 11 |
| 2.1 Pengurusan Wang Yang Tidak Terancang | 11 |
| 2.2 Hutang | 12 |
| 2.3 Mendambakan | 14 |
| 3. Proses Yang Menuju Ke Kebebasan Kewangan | 14 |
| 3.1 Langkah 1: Asas | 15 |
| Amalan: Mengira Nilai Bersih Peribadi. | 16 |
| Amalan: Menyediakan Belanjawan Peribadi/Keluarga | 17 |
| 3.2 Langkah 2: Simpan | 20 |
| 3.3 Langkah 3: Langsai | 21 |
| 3.4 Langkah 4: Tetapkan | 24 |
| 3.5 Langkah 5: Bebas | 26 |
| Penutup | 27 |
| Bibliografi | 30 |
| Ucapan Terima Kasih | 30 |
| Buku-Buku Dalam Siri Projek DamAI | 31 |

Wang Sebagai Amanah Tuhan

Pendahuluan

Wang bukan segala-galanya tetapi wang itu tetap penting.

Yesus banyak menggunakan ibarat semasa Dia mengajar tentang kebenaran rohani. 27% iaitu sebelas daripada empat puluh ibarat yang diajarkan oleh Tuhan Yesus adalah berkaitan dengan wang. (Jesus Film Project, 2019). Selain itu, terdapat 2300 ayat di dalam Alkitab yang mengajar tentang wang, kekayaan atau harta benda.

Pada pendapat anda mengapakah hal wang banyak diajar?

Bagaimana wang dapat menguasai seseorang? Kita selalu dengar bahawa wang dapat mencerminkan hati sebenar seseorang.

"Jangan kumpulkan harta di dunia, kerana di sini gegat dan karat merosakkannya serta pencuri memecah masuk untuk mencurinya. Kumpulkan harta di syurga, kerana di situ gegat dan karat tidak dapat merosakkannya serta pencuri tidak memecah masuk untuk mencurinya. Kerana di mana hartamu terkumpul, di situ lah hatimu tertumpu." (Matius 6:19-21)



Tuhan Yesus mengajar bahawa apa yang kita pilih sebagai harta itulah yang kita asyik kumpulkan, dari situlah akan kelihatan kepentingan utama di dalam hati kita. Dalam kata lain, apa yang hati kita inginkan, itulah yang kita **sembah**. Oleh sebab itu, Tuhan Yesus menyambung dengan mengatakan:

Apa yang hati kita inginkan, itulah yang kita sembah.

Seseorang tidak mungkin mengabdi diri kepada dua orang tuan. Dia akan membenci yang seorang dan mengasihi yang lain; atau akan setia kepada yang seorang dan mencela yang lain. Demikianlah, kamu tidak dapat menjadi hamba Allah dan juga hamba kekayaan. (Matius 6:24)

Siapakah **tuan** kita yang sebenar ditentukan kepada siapa kita **mengabdikan diri**, kepada Allah atau kekayaan (wang)? Hal ini merupakan perkara yang amat serius. Jika kita menjadi hamba kepada kekayaan dan wang, maka itulah tuhan kita. Sehubungan dengan itu, kita akan berdosa kerana menyembah berhala dan melanggar hukum yang pertama dan kedua yang diberikan kepada Musa:

Siapakah tuan kita yang sebenar ditentukan kepada siapa kita mengabdikan diri, kepada Allah atau kekayaan (wang)?

Wang Sebagai Amanah Tuhan

Jangan ada padamu tuhan-tuhan lain selain Aku. Jangan buat patung ukiran untuk dirimu atau wujudkan apa-apa pun yang ada di langit di atas, atau yang ada di bumi di bawah, atau di dalam air di bawah bumi. Jangan sujud menyembahnya atau beribadat kepadanya, kerana Aku, Tuhan, Allahmu, Allah yang cemburu, yang membala kesalahan ayah kepada anak-anaknya, kepada keturunan ketiga dan keempat dalam kalangan mereka yang membenci Aku. Namun demikian, Aku menunjukkan kasih setia-Ku kepada keturunan yang keseribu dalam kalangan mereka yang mengasihi Aku dan yang taat berpegang teguh pada segala perintah-Ku. (Keluaran 20:3-6)

Maka, urusan kita dalam hal kewangan ialah suatu isu yang amat penting dan serius. Tambahan lagi, Tuhan Yesus mengajar bahawa cara kita menguruskan kewangan kita ialah suatu hal amanah daripada Allah.

Aku berkata kepadamu supaya menggunakan kekayaan dunia untuk mendapat sahabat bagi dirimu. Apabila kekayaanmu lenyap, kamu akan disambut ke tempat kediaman yang kekal. Orang yang setia dalam perkara yang kecil akan setia juga dalam perkara yang besar; dan orang yang tidak setia dalam perkara yang kecil tidak akan setia dalam perkara yang besar. Oleh itu, jika kamu tidak setia dalam kekayaan dunia ini, siapakah yang akan mengamanahkan kekayaan yang sejati kepadamu? Dan jika kamu tidak setia dengan milik orang lain, siapakah pula yang akan memberimu apa yang menjadi milik kamu sendiri? "Seorang hamba tidak mungkin mengabdi diri kepada dua orang tuan. Dia akan membenci yang seorang dan mengasihi yang lain; atau akan setia kepada yang seorang dan mencela yang lain. Demikianlah, kamu tidak dapat menjadi hamba Allah dan juga hamba kekayaan." (Lukas 16:9-13)

Cara kita menguruskan kewangan kita ialah suatu hal amanah dan ujian kepercayaan daripada Allah.

Pada asasnya segala ciptaan ialah hak milik Allah yang merupakan Pencipta:

Bumi ini milik Tuhan dengan segala yang di dalamnya, dunia dan semua penghuninya; (Mazmur 24:1)

(Lihat juga Ulangan 10:14; 1 Tawarikh 29:11-12,14b)

Maka, apa yang kita ada sebenarnya datang daripada Allah sendiri. Dalam kata lain, semua yang kita ada ialah milik Allah yang diamanahkan kepada kita untuk diuruskan. Itulah persepsi Alkitabiah yang perlu di guna pakai oleh kita yang memanggil diri murid Kristus.

Kamu hendaklah memandang kami sebagai hamba Kristus yang diamanahkan dengan rahsia-rahsia Allah. Setelah dipertanggungjawabkan dengan amanah, hamba demikian itu wajib membuktikan bahawa dia dapat dipercayai. (1 Korintus 4:1-2)

Begitulah Tuhan Yesus menyeru kita untuk menjadi orang yang **setia** dengan apa yang Allah telah amanahkan kepada kita (Lukas 16:10). Kesetiaan ini bermula dan diuji berkaitan dengan hal kekayaan dunia ini. Jika kita lulus ujian ini, maka Allah akan mempercayai kita dan mengamanahkan kekayaan yang sejati kepada kita. Dalam kata lain, menguruskan wang Allah dalam dunia ini ialah amanah dan **ujian kepercayaan daripada Tuhan** untuk kita. Biarlah kita didapati setia, berintegriti dan bijaksana dalam pengurusan wang.

Wang Sebagai Amanah Tuhan



1.0 Prinsip-Prinsip Alkitabiah Untuk Menguruskan Wang

1.1 Prinsip Melaksanakan Amanah Tuhan

Buku ini bukanlah sebuah buku yang mengajar anda bagaimana menjadi seorang yang kaya tetapi bagaimana anda dapat menjadi seorang murid Kristus yang beramanah.

Asas terpenting dalam hal menguruskan wang ialah segala yang kita miliki sebenarnya milik Allah yang diamanahkan kepada kita.

Asas terpenting dalam hal menguruskan wang ialah segala yang kita miliki sebenarnya milik Allah yang diamanahkan kepada kita. Maka dalam erti kata lain, kita mesti memegang wang kita dengan ‘ringan’ dan bersiap-sedia untuk melakukan apa yang Allah minta. Ringan yang dimaksudkan di sini adalah menjadi seorang yang murah hati dalam situasi yang memerlukan.

Saya bukanlah seorang yang kaya-raya. Saya tidak pernah memiliki perniagaan yang mengaut keuntungan berjuta-juta Ringgit Malaysia. Jadi, apa yang dikongsi di dalam buku ini bukanlah panduan untuk anda yang ingin menjadi kaya. Sepanjang kerjaya saya sebagai seorang pegawai kerajaan, saya cuma mendapat gaji bulanan. Sekarang ini saya seorang yang sudah berpencen.

Jika anda seorang yang makan gaji atau memiliki perniagaan yang kecil, maka prinsip-prinsip dan amalan-amalan Alkitabiah yang dikongsi di sini dapat membantu anda untuk mencapai **kebebasan kewangan** (*financial freedom*). Kebebasan kewangan bermaksud anda tidak berhutang dengan mana-mana institusi kewangan atau orang lain.

Tetapi jika anda ingin menjadi seorang yang kaya raya, carilah buku yang lain yang mengajar anda berbuat demikian. Saya menulis buku ini untuk majoriti orang yang bukan dikira orang yang kaya raya dan merupakan jutawan. Hasrat saya menulis buku ini adalah untuk membantu anda untuk mencapai kebebasan kewangan.

Sasaran buku ini: Menjadi seorang yang beramanah dan mencapai kebebasan kewangan.

Wang Sebagai Amanah Tuhan

Saya masih ingat pada hari saya dan isteri saya pergi ke bank untuk melangsakan hutang rumah kami selepas 15 tahun membayar ansuran bulanan kepada bank. Betapa gembiranya kami apabila kami tiada lagi apa-apa hutang. Kami rasa seperti suatu beban yang begitu berat terlepas daripada bahu kami. Tetapi perjalanan itu bukan suatu perjalanan yang singkat tetapi suatu yang panjang. Hari ini, kami dapat mengecapi kebebasan kewangan dan kami tidak perlu lagi khawatir mengenai hal hutang.

Dengan gaya hidup sederhana, kami bebas melayani Tuhan tanpa memikirkan tentang bagaimana mencari duit untuk menyara hidup kita. Kami bebas memberi kepada kerja Allah dan keperluan-keperluan yang Allah tunjukkan kepada kami. Apabila kami melayani atau berkhidmat di mana-mana sahaja Allah membimbang kami, kami tidak meminta apa-apa bayaran kerana apa yang kami miliki sudah mencukupi. Kebebasan kewangan ialah suatu berkat yang kami amat hargai pada peringkat umur kami yang semakin hampir masuk dalam kategori warga emas.

Kami bukan orang yang kaya raya tetapi kami bersyukur kepada Tuhan kerana Dialah yang membolehkan kami menikmati apa yang tersedia oleh-Nya kepada kami dalam fasa hidup terakhir kami ini. Kami dapat memahami maksud ayat berikut:

Jangan sampai aku kenyang lalu menyangkal Engkau dan berkata, "Siapakah Tuhan itu?" Jangan sampai aku miskin lalu mencuri dan memfitnah nama Allahku. (Amsal 30:9)

Keadaan yang mencukupi ialah keadaan yang baik sekali. Firman Tuhan mengatakan bahawa keadaan puas hati sebegini sangat menguntungkan:

Kesalihan yang disertai dengan rasa puas membawa keuntungan besar. Kita tidak membawa apa-apa ke dalam dunia ini, dan pasti sekali kita tidak dapat membawa apa-apa apabila kita meninggalkannya. Oleh itu, jika kita ada pakaian dan makanan, kita harus berasa puas. (1 Timotius 6:6-8)

Sekiranya kita dapat memenuhi amanah Tuhan kepada kita untuk memberkati orang lain dengan wang-Nya, maka itu sudah cukup baik. Oleh itu, prinsip Alkitabiah kedua yang berikut adalah penting untuk difahami dan dipraktikkan.



1.2 Prinsip Memberi Dengan Murah Hati

Satu amalan yang paling kerap disebut adalah **memberi perpuahan**. Pemberian perpuahan ialah suatu amalan Perjanjian Lama yang mana orang Israel memberi sepersepuluh daripada semua hasil pertanian atau penternakannya.

Seorang Yahudi yang tidak memberi persepuhannya dituduh merompak Allah!

Wang Sebagai Amanah Tuhan

Semua persembahan sepersepuluh daripada hasil tanah, baik biji-bijian daripada tanah maupun daripada buah pohon-pohnan, ialah milik Tuhan. Itu ialah bahagian suci bagi Tuhan. Akan tetapi, jika seseorang hendak menebus sebahagian daripada persembahan sepersepuluhnya, maka hendaklah dia menambah seperlima daripada nilainya. Sepersepuluh daripada kawanan lembu atau kawanan domba, iaitu haiwan kesepuluh yang berlalu di bawah tongkat gembala sewaktu dihitung, harus menjadi persembahan suci bagi Tuhan. (Imamat 27:30-32)

Seorang Yahudi yang tidak memberi persepuhannya dituduh merompak Allah!

"Sanggupkah manusia merompak Allah? Namun demikian, kamu merompak Aku. "Tetapi kamu bertanya, 'Bagaimanakah kami merompak Engkau?' "Dalam hal persembahan sepersepuluh dan persembahan khusus. Kamu dikutuk atas sebab kamu merompak Aku – ya, kamu seluruh bangsa! Bawalah seluruh persembahan sepersepuluh kamu ke dalam perbendaharaan, supaya ada makanan di Bait-Ku. Kemudian ujilah Aku dalam hal ini," firman Tuhan alam semesta, "adakah Aku tidak membuka bagimu tingkap-tingkap di langit dan mencurahkan berkat kepadamu sampai tiada tempat yang memadai menampungnya. Lalu bagi pihak kamu, Aku akan mencela segala hama pemusnah, sehingga hama itu tidak memusnahkan hasil tanahmu. Pokok anggurmu di ladang tidak akan menggugurkan buah sebelum tiba masanya," demikianlah firman Tuhan alam semesta. "Segala bangsa akan menyebut kamu berbahagia, kerana kamu akan menjadi negeri kesukaan," demikianlah firman Tuhan alam semesta. (Maleakhi 3:8-12)

Sebaliknya, seorang yang memberi perpuhannya dijanjikan oleh Allah berkat yang melimpah-limpah sehingga 'tiada tempat yang memadai menampungnya.'

Tetapi apakah amalan memberi yang diajar di dalam Perjanjian Baru?

Kami ingin memberitahumu, saudara-saudaraku, tentang kasih kurnia Allah kepada jemaah-jemaah di Makedonia. Sungguhpun mereka banyak diuji dengan kesusahan, namun kegembiraan mereka melimpah. Walaupun mereka sangat miskin, mereka kaya dalam kemurahan hati. Aku dapat memberikan kesaksian bahawa dengan rela hati mereka telah memberi setakat termampu, malah lebih daripada itu. (2 Korintus 8:1-3)



Wang Sebagai Amanah Tuhan

Asas untuk memberi di dalam Perjanjian Baru bukan berdasarkan suatu peraturan seperti persepuhan tetapi atas **prinsip kemurahan hati**. Jemaah di Makedonia pada masa itu bukanlah jemaah yang penuh dengan orang yang kaya-raya. Tetapi Paulus memuji mereka kerana walaupun mereka sangat miskin, mereka kaya dengan kemurahan hati. Ini bermaksud mereka memberi lebih daripada yang dijangka.

Asas untuk memberi di dalam Perjanjian Baru bukan berdasarkan suatu peraturan seperti persepuhan tetapi atas prinsip kemurahan hati.

Keadaan ini adalah bersamaan dengan apa yang diperhatikan oleh Tuhan Yesus ketika Dia duduk di hadapan dengan sebuah peti wang persembahan:

Yesus duduk berhadapan dengan peti wang persembahan dan melihat betapa orang memasukkan wang ke dalamnya. Ramai orang kaya memasukkan sumbangan yang besar. Kemudian seorang balu yang miskin memasukkan dua keping wang tembaga, yang sangat kecil nilainya. Yesus memanggil murid-murid-Nya lalu berkata kepada mereka, "Sesungguhnya, Aku berkata kepadamu, balu yang miskin itu telah memberi lebih daripada semua orang yang telah memasukkan wang ke dalam peti persembahan; kerana mereka memberi daripada kekayaan mereka yang melimpah, tetapi dia daripada kemiskinannya telah memasukkan semua yang ada padanya, seluruh rezekinya." (Markus 12:41-44)

Balu miskin itu diiktiraf dan dipuji oleh Tuhan Yesus bukan kerana jumlah persembahannya tetapi baki wangnya selepas dia telah memberi, iaitu dia telah memberi seluruh rezekinya dan tidak menyimpan satu sen pun untuk diri sendiri. Pemberiannya adalah berdasarkan prinsip kemurahan hati. Begitulah juga jemaah miskin di Makedonia memberi dengan murah hati walaupun mereka miskin dan tidak berkecukupan.

Dalam konteks berikut adalah berkaitan dengan prinsip memberi atas dasar kemurahan hati:

Ingatlah firman ini: Orang yang menyemai sedikit akan menuai sedikit, dan orang yang menyemai banyak akan menuai banyak. Masing-masing hendaklah memberi setulus hati, jangan dengan rasa enggan atau terpaksa, kerana Allah mengasihi orang yang memberi dengan gembira. Allah berkuasa melimpahkan kasih kurnia-Nya kepadamu, supaya kamu dapat memenuhi segala keperluanmu dan berlebihan pula untuk amal kebajikan. Sebagaimana tersurat, "Dia telah menaburkan kurnia-Nya di merata-rata dalam kalangan orang miskin; Perbenaran-Nyai kekal selama-lamanya." Allah telah menyediakan benih untuk disemai dan roti untuk dimakan. Semoga Allah melipatgandakan benih yang telah kamu semai dan memperbanyak buah hasil perbenaranmu, serta memperkaya kamu dalam segala hal, sehingga kamu dapat terus-menerus bermurah hati. Pemberianmu yang disampaikan melalui kami akan menimbulkan rasa syukur kepada Allah. Kerana pekerjaan mulia yang sedang kita usahakan ini bukan sahaja akan menampung kekurangan orang salih, tetapi juga menyebabkan ramai orang mengucap syukur kepada Allah.

Wang Sebagai Amanah Tuhan

Melalui pekerjaan mulia ini, kamu membuktikan imanmu dan mereka memuliakan Allah kerana melihat kesetiaan pengakuanmu terhadap Injil Kristus serta kemurahan hati yang kamu tunjukkan dengan pemberian kepada mereka dan semua orang. Mereka berdoa untukmu dan ingin berdamping denganmu kerana kasih kurnia Allah yang melebihi segala-galanya memenuhi dirimu. Segala puji dan syukur kepada Allah kerana kurniannya yang tidak terperikan. (2 Korintus 9:6-15)

Untuk mendapat hasil yang banyak, kita mesti menabur dengan murah hati. Jika seorang petani menabur sedikit sahaja benih, nescaya dia akan mendapat hasil yang sedikit juga. Sebaliknya, jika dia menabur banyak benih ke dalam tanah, besar kemungkinan dia akan mendapat hasil yang banyak jika keadaan mengizinkan.

Untuk mendapat hasil yang banyak, kita mesti menabur dengan murah hati.

Secara sama, dalam hal memberi, kita diseru untuk memberi dengan murah hati sesuai dengan jumlah yang Allah telah amanahkan kepada kita kerana tindakan ini akan memberi pemulangan berkat yang besar. Berkat yang dimaksudkan adalah apabila orang lain mengucap syukur kepada Tuhan kerana bantuan yang disalurkan melalui kita. Sukacita dan kegembiraan yang tidak terhingga akan dikecapi oleh kita apabila Allah dimuliakan kerana kita menjalankan amanah untuk menguruskan wang-Nya dengan baik mengikut kehendak-Nya. Oleh sebab itu, Tuhan Yesus telah mengatakan bahawa memberi itu lebih berkatnya daripada menerima.

Dalam semua perkara aku telah menunjukkan teladan kepadamu iaitu bagaimana kamu juga patut bekerja demikian untuk menolong orang yang lemah; dan ingatlah firman Tuhan Yesus, 'Memberi itu lebih berkatnya daripada menerima.' (Kisah Para Rasul 20:35)

Apa yang penting dalam amalan memberi di dalam Perjanjian Baru bukanlah berdasarkan jumlah yang ditetapkan (seperti amalan memberi perpuhulan di dalam Perjanjian Lama) tetapi sikap hati semasa memberi. Kita diseru memberi dengan murah hati, dengan tulus dan dengan gembira. Maka, jumlah yang Allah telah tunjukkan kepada anda, berilah dengan tulus dan gembira.

Jika kita boleh dipercayai dalam hal memberi, maka Allah akan mengamanahkan lebih banyak lagi hal dan kerja untuk kita uruskan di dalam Kerajaan-Nya. Penggunaan wang ialah ujian Allah untuk kita. Jika kita dapat mengekalkan hati yang bebas daripada mencintai wang, maka kita akan dapat mengelakkan segala kejahanatan:

Orang yang mahu kaya tergoda dan terperangkap oleh pelbagai keinginan yang sia-sia dan berbahaya, yang menjerumuskannya ke dalam kerosakan dan kemasuhan. Cinta akan wang punca segala kejahanatan. Sesetengah orang memburu wang dengan begitu tamaknya sampaikan tersesat daripada iman dan akhirnya menanggung berbagai-bagai kesengsaraan jiwa. (1 Timotius 6:9-10)


Cinta akan wang dan ketamakan wang sudah tentu akan membawa kerosakan dan kemasuhan dalam kehidupan kita sehingga kita boleh tersesat daripada iman

Wang Sebagai Amanah Tuhan

Cinta akan wang dan ketamakan wang sudah tentu akan membawa kerosakan dan kemusnahan dalam kehidupan kita sehingga kita boleh tersesat daripada iman. Itulah bahayanya jika wang tidak diurus dengan baik mengikut prinsip Alkitabiah. Biarlah wang yang menjadi hamba kepada kita dan bukannya menjadi tuan kita. Orang yang memperhambakan dirinya kepada kekayaan dan wang akan mengalami berbagai-bagai kesengsaraan.

Biarlah wang yang menjadi hamba kepada kita dan bukannya menjadi tuan kita.

Begitu juga, sekiranya kita tidak menguruskan wang dengan baik tetapi mengamalkan sikap acuh tak acuh dan lalai maka kita akan mengalami padah yang sama. Oleh sebab itu, dalam bahagian yang seterusnya kita akan mempertimbangkan bagaimana kehidupan seseorang menjadi perit akibat pengurusan wang yang tidak bijak.



2. Jerat-Jerat Kewangan Yang Perlu Dielak

2.1 Pengurusan Wang Yang Tidak Terancang

Seorang boleh mengamal gaya hidup berikut:

1. Hidup melebihi kemampuannya.
2. Hidup mengikut kemampuannya.
3. Hidup di bawah kemampuannya.

Seorang yang **hidup melebihi kemampuannya**, biasanya tidak merancang cara dia membelanjakan wangnya. Dalam pada itu, dia belanja mengikut sesuka hatinya. Apa yang dia lihat dan suka, dia akan terus membelinya tanpa berfikir sama ada dia mampu atau tidak. Penggunaan kad kredit atau meminjam daripada orang lain ialah amalan biasa bagi dia.

Bagi orang yang seperti ini, biasanya perbelanjaan bulanan melebihi pendapatan bulanannya. Maka, lubang hutangnya menjadi lebih besar dan lebih dalam sehingga dia terperangkap dalam kitaran pelbagai hutang yang dia sendiri rasa tidak dapat dilangsakan. Orang yang hidup melebihi kemampuannya mengalami berbagai-bagai kesengsaraan. Jika dia mempunyai orang yang bergantung kepadanya, kesengsaraan dan masalahnya akan melimpah ke dalam kehidupan mereka. Cara hidup begini sudah tentu tidak digalakkan.

Wang Sebagai Amanah Tuhan



Orang yang hidup mengikut **kemampuannya** berada dalam keadaan yang lebih baik berbanding dengan dia yang hidup melebihi kemampuannya. Orang yang sebegini mendapati dia hanya cukup makan sahaja. Pada akhir setiap bulan, dia tidak ada baki wang dan gaji dia amat diperlukan untuk terus hidup.

Dia sangat khuatir jika berlaku apa-apa kecemasan kerana keperluan itu akan menyebabkan dia kekurangan wang untuk bulan itu. Contohnya, kalau kenderaannya rosak, maka dia terpaksa menggunakan kad kredit atau meminjam daripada orang lain. Keadaan ini berlaku kerana orang yang sebegini tidak merancang untuk menghadapi kecemasan. Cara hidup sebegini juga tidak digalakkan.

Masalah kedua-dua jenis orang ini ialah pengurusan wang yang tidak terancang dengan baik atau tidak berdisiplin.

Apa yang disyorkan ialah menjadi seorang yang **hidup di bawah kemampuannya**. Orang yang sebegini akan merancang pengurusan wangnya dengan rapi, terperinci dan baik. Dia mempunyai belanjawan peribadi dan keluarga yang jelas dan ketara supaya standard dan gaya hidup adalah di bawah kemampuannya. Dalam kata lain, tidak kira berapa besar atau kecil gaji, pada akhir setiap bulan dia memperolehi baki untuk disimpan.

Dalam Bab 3, kita akan meneliti satu pelan strategi untuk mencapai maksud ini. Tetapi pelan strategi yang paling baikpun sekiranya tidak diikuti tidak akan mendatangkan berhasil. Kita perlu berdisiplin dan bertekad untuk mencapai kebebasan kewangan dalam masa jangka panjang.

**Hidup dengan berdisiplin,
terancang dan di bawah
kemampuan bagi mencapai
kebebasan kewangan dalam
masa jangka panjang.**

2.2 Hutang

Hutang ialah masalah utama yang dihadapi oleh kebanyakan orang kerana kekurangan dana untuk memperolehi sesuatu yang diperlukan. Akan tetapi ada juga orang yang tidak menguruskan kewangannya dengan baik atau yang membuat sesuatu keputusan kewangan yang buruk apabila membeli sesuatu untuk memuaskan keinginan tabiinya.



Wang Sebagai Amanah Tuhan

Salah satu cara ramai orang terjerat di dalam hutang adalah apabila mereka menggunakan kad kredit dengan sewenang-wenangnya. Orang yang tidak merancang dan mengawal penggunaan kad kredit akan mendapatkan pada akhir setiap bulan, dia tidak dapat membayar bil kad kredit tersebut. Lantaran itu, bunga dikenakan kepada hutang sedia adanya. Jika dia meneruskan tabiat ini, akhirnya dia akan berhutang dengan bank suatu jumlah yang dia tidak akan dapat membayar balik.

Jika anda mendapatkan pola setiap bulan anda tidak dapat membayar bil kad kredit anda, cadangan kami ialah “gunting sahaja kad kredit” anda supaya anda tidak menggunakanannya lagi. Maksudnya anda hentikan penggunaan kad kredit itu. Kemudian mulakan langkah-langkah yang dicadangkan dalam bab 3 untuk memulihkan keadaan kewangan anda.

Salah satu cara pekedai menarik anda membeli barang (yang anda tidak betul-betul perlu) ialah skim bayaran secara ansuran tanpa bunga dengan kad kredit. Cadangan ini nampaknya bijak tetapi kalau kita tergoda untuk membuat terlalu banyak transaksi sebegini, bayaran bil kad kredit setiap bulan akan menjadi sangat besar. Selain itu, jika anda tidak terdesak untuk membeli barang itu, lebih baik tangguhkan pembelian itu ke hari yang lain. Jika anda masih rasa anda memerlukan benda itu setelah selang waktu yang sewajarnya, barulah ambil tindakan untuk membelinya.

Jika anda seorang yang tidak dapat mengawal diri dalam penggunaan kad kredit, jangan memohon untuk menggunakanannya atau gunting kad kredit sedia ada anda. Sebagai ganti, anda boleh menggunakan kad debit atau pakai wang tunai sahaja.

Jika anda seorang yang tidak dapat mengawal diri dalam penggunaan kad kredit, jangan memohon untuk menggunakanannya. Adalah lebih baik menggunakan kad debit yang hanya membenarkan anda menggunakan wang yang sedia ada di dalam akaun bank anda. Dengan kad debit anda juga dapat membuat urusan pembelian dalam talian dan pendaftaran di hotel. Selain itu, semasa anda membuat pembelian terus gunakan wang tunai sahaja.

Sehubungan dengan itu, jangan berikan anak-anak anda kad kredit untuk digunakan sama ada untuk pembelian atau untuk kecemasan. Terdapat ibu bapa yang berfikir memberi kad kredit kepada anak-anak mereka ialah cara yang baik untuk mengajar mereka bertanggung jawab dalam menguruskan kewangan mereka. Tetapi, sebenarnya pemberian kad kredit itu memerangkap anak mereka dalam jerat syarikat kad kredit. Jika anak-anak anda belum bekerja, mereka tidak perlu dan tidak layak untuk menggunakan kad kredit.

Selain itu, ada orang terperangkap dalam hutang kerana mereka menjamin orang lain yang meminjam wang daripada bank. Firman Tuhan menasihati:

Orang yang tidak berakal budi membuat perjanjian menaja jamin, dan menjadi penjamin bagi jirannya. (Amsal 17:18)

Dalam kata lain, jangan! Jika ahli keluarga atau kawan anda tidak dapat membayar balik, bank akan mencari anda untuk melangsakan hutang individu tersebut. Itulah sebabnya bank memerlukan seorang penjamin. Jika anda tidak bersedia atau tidak berupaya membayar hutang orang lain, jangan bersetuju untuk menjadi penjamin mereka. Begitulah arahan daripada Firman Tuhan.

Wang Sebagai Amanah Tuhan

2.3 Mendambakan

Jangan mendambakan rumah jiranmu. Jangan ingini isteri jiranmu, hambanya baik yang lelaki mahupun yang perempuan, lembunya, keldainya, atau apa-apa pun yang dimiliki oleh sesamamu. (Keluaran 20:17)

Perintah Allah ini adalah untuk menghindari anda daripada bersaing dengan orang lain dalam mengekalkan gaya hidup yang lebih tinggi daripada yang sepatutnya. Jika anda selalu mendambakan barang yang dimiliki orang lain, anda akan terus membeli barang demi barang untuk menandingi mereka. Perbuatan sebegini, sebenarnya berpunca daripada sikap yang tamak dan bongkak.

Anda tidak perlu cuba mengagumkan orang lain dengan barang-barang anda. Kawan-kawan yang sejati tidak akan menilai sama ada anda seorang yang kaya atau tidak. Mereka akan menerima anda sebagai seorang kawan kerana perhubungan yang telah terjalin dalam masa baik atau masa susah - bukan kerana anda memberi bayangan bahawa anda memiliki banyak barang yang mahal dan terkini.

Beli apa yang anda betul-betul perlu sahaja dan hidup di bawah kemampuan anda. Itulah langkah yang bijak dan wajar bagi seorang murid Kristus.

Kawan-kawan yang sejati tidak menilai anda berdasarkan gaya hidup yang mewah tetapi berdasarkan perhubungan kasih yang telah terjalin.



3. Proses Yang Menuju Ke Kebebasan Kewangan

Pengurusan wang yang bijak perlu dipelajari. Bukan semua orang tahu secara automatik bagaimana menguruskan wang dengan bijak. Oleh sebab itu, jika anda baru mula bekerja, anda boleh mengambil langkah-langkah di bawah untuk menguruskan kewangan anda dengan sasaran jangka panjang agar anda dapat mencapai kebebasan kewangan kelak. Lebih awal anda mula mempraktikkannya, anda akan terselamat daripada berbagai-bagai kesengsaraan lantaran pengurusan kewangan yang buruk.

Pengurusan wang yang bijak perlu dipelajari.

Wang Sebagai Amanah Tuhan

Jika anda sudah terperangkap dalam jerat hutang, anda juga dapat menggunakan langkah-langkah di bawah untuk membantu anda keluar daripada jerat itu. Anda masih ada harapan jika anda mengikuti langkah-langkah yang terkandung di gambar rajah 1:

Gambar rajah 1 menunjukkan proses yang menuju ke kebebasan kewangan.



Gambar rajah 1: Proses yang menuju ke kebebasan kewangan

Rancangan jangka panjang ini mengikut satu proses mengikut susunan langkah demi langkah. Bila anda sudah mencapai satu langkah dalam proses ini, baharu anda dapat berganjak ke langkah yang seterusnya.

3.1 Langkah 1: Asas

Seperti yang kita telah pertimbangkan dari awal bahawa asas bagi menguruskan wang ialah setiap sen dan wang yang kita ada sebenarnya milik Allah, yang telah diamanahkan kepada kita. Jadi, pergunakanlah wang tersebut dengan murah hati untuk memberkati orang lain dan semua pekerjaan Allah sepetimana jemaah di Makedonia telah tunjukkan kepada kita.

Mereka telah meminta bersungguh-sungguh kepada kami agar mereka diberi anugerah untuk menyumbang kepada keperluan orang salih. Hal ini benar-benar di luar jangkaan kami. Mereka mempersesembahkan diri pertama-tama kepada Tuhan, kemudian kepada kami juga dengan kehendak Allah. (2 Korintus 8:4-5)

Berilah dengan rela hati dan dengan sikap sukacita. Tetapkan apa yang hendak diberi dan lakukannya secara konsisten. Apa jua keadaan kita, kita mesti memberi kepada kerja Allah dan orang miskin dengan murah hati. Jadi, kita mesti merancang untuk memberi. Itulah perkara pertama yang kita perlu masukkan dalam belanjawan peribadi kita. Jangan berkompromi tentang hal ini kerana Firman Tuhan mengatakan:

Muliakanlah Tuhan dengan hartamu dan dengan hasil pertama daripada segala penghasilanmu, maka segala bangsal hasil tuaianmu akan terisi hingga melimpah-ruah dan meluaplah air anggur di dalam segala tempat pemerasan anggurmumu. (Amsal 3:9-10)

Jadi, apabila kita mendapat gaji atau keuntungan, tetapkan apa yang perlu diasingkan untuk pemberian kita mengikut kemampuan kita.

Pada hari pertama setiap minggu, setiap orang daripada kamu hendaklah mengasingkan wang menurut kemampuan masing-masing dan menyimpannya. Janganlah setelah aku datang baru kamu mula mengumpulnya. (1 Korintus 16:2)

Kemudian apabila tiba masa untuk memberi, kita tidak perlu berfikir panjang, kerana wang itu sudah pun diasingkan dan siap sedia untuk diberi.

Wang Sebagai Amanah Tuhan


Hal ini merupakan suatu perkara asas dan perlu diamalkan selalu secara berterusan seumur hidup kita di dunia ini.

Selain itu, kita juga mesti merancang perbelanjaan kita dengan rapi. Begitulah yang diajar oleh Tuhan Yesus sendiri melalui kiasannya:

Jika seseorang antara kamu ingin membina sebuah menara, dia akan terlebih dahulu duduk dan menganggarkan perbelanjaannya untuk memastikan sama ada dia mempunyai wang yang cukup untuk menyiapkan pembinaan itu. (Lukas 14:28)

Untuk membuat anggaran perbelanjaan sesuatu projek, sudah tentu seseorang mesti mengambil kira berapa banyak wang yang sedia ada serta yang boleh diperolehi semasa pembinaan. Begitulah juga, kita mesti mengetahui apakah nilai bersih peribadi kita dengan mengira aset dan liabiliti kita. Kemudian kita mesti merancang belanjawan peribadi kita dengan teliti supaya belanjawan itu adalah sihat dan seimbang.

Memberi dan merancang belanjawan ialah amalan asas untuk langkah yang pertama ini



Amalan: Mengira Nilai Bersih Peribadi.

KEDUDUKAN KEWANGAN TERKINI

Untuk mengetahui kedudukan kewangan anda, sila buat pengiraan terperinci seperti di bawah:

Aset (Nilai Terkini)


| No. | Item | Nilai (RM) |
|-----|---|------------|
| 1 | Wang Tunai / Akaun Bank | |
| 2 | Saham | |
| 3 | Rumah | |
| 4 | Tanah dan Hartanah Lain | |
| 5 | Nilai Perniagaan | |
| 6 | Perkakas | |
| 7 | Barang Kemas | |
| 8 | Pencen / Rancangan Persaraan | |
| 9 | Nilai Wang Tunai Insuran | |
| 10 | Lain-lain (Keahlian Kelab, Warisan Keluarga, dan lain-lain) | |
| 11 | Jumlah Aset (AS) | |

Wang Sebagai Amanah Tuhan

Liabiliti (Nilai Terkini)

| No | Item | Nilai (RM) |
|----|-----------------------------------|------------|
| 1 | Hutang Kad Kredit | _____ |
| 2 | Pinjaman Kenderaan | _____ |
| 3 | Pinjaman Perumahan | _____ |
| 4 | Pinjaman Hartanah Lain | _____ |
| 5 | Hutang Kepada Orang Lain | _____ |
| 6 | Hutang Perniagaan | _____ |
| 7 | Hutang Perubatan / Bil-Bil Lain | _____ |
| 8 | Hutang Perubatan / Bil-Bil Lain | _____ |
| 9 | Pinjaman Bank dan lain-lain | _____ |
| 10 | Hutang Lain (Nyatakan: _____) | _____ |
| 11 | Lain-Lain (Nyatakan: _____) | _____ |
| 12 | Jumlah Liabiliti (LB) = | _____ |

Nilai Bersih Peribadi (AS-LB) = _____



Amalan: Menyediakan Belanjawan Peribadi/Keluarga

Wang Sebagai Amanah Tuhan

Menyediakan belanjawan ialah amalan yang asas sekali. Kita tidak boleh menguruskan wang kita tanpa ada belanjawan yang jelas, tepat dan realistik. Jika anda sudah berkahwin, sediakan belanjawan keluarga anda bersama-sama pasangan anda. Suami-isteri mesti bersetuju tentang perancangan belanjawan. Kalau tidak, perancangan itu akan gagal pada peringkat implementasi.

Untuk mengetahui jumlah untuk setiap item, rekodkan pendapatan dan perbelanjaan anda untuk dua atau tiga bulan berturut-turut dan cari puratanya.

Untuk perbelanjaan tahunan (seperti insuran kereta), bahagikan jumlahnya dengan 12 untuk mendapat perbelanjaan bulanan.



BELANJAWAN PERIBADI/KELUARGA

Pendapatan

| Item | RM |
|---|----|
| Pendapatan Suami | |
| Pendapatan Isteri | |
| Pendapatan Lain | |
| Jumlah Pendapatan Sebulan (A) = RM _____ | |
| Jumlah Perbelanjaan Sebulan (dari B di bawah) = RM _____ | |
| Lebihan / Defisit (A-B) = RM _____ | |

Wang Sebagai Amanah Tuhan



Perbelanjaan



| Item | RM |
|--|-------|
| Pemberian (Gereja, Amal, Organisasi, Ibu Bapa) | _____ |
| Utiliti: | _____ |
| Bil Elektrik | _____ |
| Bil Air | _____ |
| Telefon: | _____ |
| Rumah | _____ |
| Isteri | _____ |
| Anak-anak | _____ |
| Bil Internet / TV | _____ |
| Bil Dewan Bandaraya | _____ |
| Makanan: | _____ |
| Barang Runcit | _____ |
| Makan di Luar (Restoran) | _____ |
| Rumah: | _____ |
| Barangan Kegunaan Rumah | _____ |
| Pengangkutan: | _____ |
| Petrol | _____ |
| Parkir | _____ |
| Penyelenggaraan (Pembaikan, Tukar Tayar & Bateri) | _____ |

Amalan: Menyediakan Belanjawan Peribadi/Keluarga

Wang Sebagai Amanah Tuhan

| Item | RM |
|---|-------|
| Insuran, Cukai Jalan dan Lesen Memandu | _____ |
| Tabung Menggantikan Kereta | _____ |
| Yuran (Sekolah, Tuisyen, Kelas, Jagaan) | _____ |
| Rekreasi | _____ |
| Perubatan: | _____ |
| Ubat / Makanan Tambahan | _____ |
| Bil Doktor/Doktor Gigi | _____ |
| Pakaian: | _____ |
| Orang Dewasa | _____ |
| Anak-Anak | _____ |
| Pinjaman: | _____ |
| Kenderaan | _____ |
| Rumah | _____ |
| Simpanan & Pelaburan | _____ |
| Potongan: | _____ |
| Cukai Pendapatan | _____ |
| KWSP, SOCSO | _____ |
| Insuran | _____ |
| Lain-lain | _____ |

| Item | RM |
|-------------------|-------|
| JUMLAH (B) | _____ |

3.2 Langkah 2: Simpan

Setelah kita memenuhi langkah pertama yang paling asas, kita bersedia untuk melakukan langkah yang kedua, iaitu merancang untuk menyimpan wang. Tidak kira sama ada anda bebas daripada hutang atau mengalami beban hutang yang berat, anda perlu mengamalkan langkah menyimpan wang pada setiap bulan.

Ada empat hal yang kecil di bumi namun sangat bijaksana: semut, makhluk yang tidak kuat tetapi menyediakan makanannya pada musim panas; (Amsal 30:24-25)

Tidak kira sama ada anda bebas daripada hutang atau mengalami beban hutang yang berat, anda perlu mengamalkan langkah menyimpan wang pada setiap bulan.

Menyimpan wang diperlukan supaya kita ada lebihan wang untuk waktu kecemasan. Selain itu, amalan ini juga merupakan suatu tabiat yang sangat bijak dan sepatutnya diamalkan sepanjang hayat kita. Kemungkinan orang yang sudah terjerat dalam hutang apabila mendengar cadangan ini akan bertanya, "Bagaimanakah saya boleh menyimpan wang walhal saya mempunyai begitu banyak hutang?" Jawapan ini, akan dijawab dalam Langkah 3. Tetapi buat masa ini, bertekad untuk memulakan amalan dan tabiat menyimpan wang.

Wang Sebagai Amanah Tuhan

Menurut Ramsey (2013), menyimpan wang di tabung kecemasan ialah cara yang paling baik untuk bermula menyimpan wang. Apakah kelayakan untuk menggunakan wang daripada tabung kecemasan? Membeli barang-barang atau pergi bercuti tidak layak untuk menggunakan wang tabung ini. Perkara-perkara yang layak untuk tabung kecemasan ialah kehilangan pendapatan secara tiba-tiba, kerosakan kereta yang teruk, kematian, kehamilan tidak terancang dan lain-lain.

Jika ini ialah kali pertama anda menyimpan duit untuk tabung kecemasan, mula dengan satu amaun sasaran yang realistik dan dapat dicapai secepat mungkin. Ramsey mencadangkan antara RM 500-1000 sebagai sasaran permulaan, bergantung kepada keupayaan anda. Anda perlu memilih suatu amaun sasaran yang realistik yang dapat dicapai secepat mungkin kerana kejayaan ini akan memberi semangat kepada anda.

Mula dengan satu amaun sasaran yang realistik, dan dapat dicapai secepat mungkin.

Tabung kecemasan pertama ini, boleh disimpan sebagai wang tunai. Tetapi untuk sasaran yang seterusnya, saya cadangkan anda membuka satu akaun bank yang khas untuk tempat menyimpan wang sahaja. Wang yang dimasukkan ke dalam akaun tersebut tidak boleh digunakan dengan sewenang-wenangnya selain untuk kes kecemasan sahaja.

Setelah anda mencapai sasaran anda yang pertama, anda digalakkan terus berusaha untuk mendapat wang simpanan yang mencukupi untuk perbelanjaan 3-6 bulan.

Menyimpan wang untuk tabung kecemasan.
Sasarannya ialah wang simpanan yang mencukupi untuk perbelanjaan 3-6 bulan.



3.3 Langkah 3: Langsai

Jika anda sudah berjaya mencapai sasaran pertama untuk tabung kecemasan, maka anda boleh beralih ke langkah 3 yang amat mencabar, iaitu melangsaikan semua hutang kecuali pinjaman perumahan atau pinjaman perniagaan yang memerlukan perhatian dan pelan jangka panjang (Kita akan mempertimbangkan hal ini dalam Langkah 4).

Jika anda tidak mempunyai banyak hutang,kekalkan keadaan ini. Syabas kerana anda mempunyai kemungkinan yang sangat cerah untuk mencapai kebebasan kewangan dalam masa yang terdekat. Tetapi jika anda seorang yang baru bekerja atau baru berkahwin dan memulakan keluarga baharu, maka dalam langkah ini anda perlukan fokus dan ketabahan yang sungguh-sungguh.

Wang Sebagai Amanah Tuhan

Namun begitu, jangan tawar hati kerana ramai orang telah berjaya mengharungi peringkat ini dengan berjaya dan anda juga dapat mencapai kejayaan yang sama jika anda mengikut rancangan seperti yang disyorkan di bawah. Hal ini termasuk anda yang sudah sekian lama ini terperangkap dalam jerat hutang yang membebankan dan semakin meningkat.

Terima pengajaran daripada ayat ini:

Seekor kijang dapat melepasinya pemburunya kerana binatang ini sangat peka dengan bahaya diserang oleh pemangsa. Apabila seekor kijang dalam suatu kumpulan mengesan pemangsa, kijang itu akan memberi amaran kepada kijang-kijang yang lain. Apabila pemangsa cuba menyerang, mereka akan melarikan diri dalam semua arah untuk mengelirukan pemangsa. Selain itu, kijang itu juga akan berlari secara lintang-pukang terutamanya jika pemangsa itu ialah binatang yang dapat berlari dengan laju. Dengan cara ini, pemangsa itu akan menjadi letih dengan cepat dan menjadi kecewa. Dalam kata lain, seekor kijang menggunakan kebijaksanaan dan ketabahan untuk melepaskan diri daripada tangan pemburu.

Lepaskanlah dirimu seperti kijang daripada tangan pemburu, dan seperti burung daripada tangan pemikat. (Amsal 6:5)

Maka, anda yang menanggung beban hutang mesti mempunyai keazaman untuk melepaskan diri daripada semua pemutang untuk mencapai kebebasan kewangan.

Orang kaya menguasai orang miskin, dan si penghutang menjadi hamba kepada si pemutang. (Amsal 22:7)

Jangan berasa terhutang apa-apa kepada sesiapa pun kecuali kasih-mengasihi, kerana seseorang yang mengasihi sesama manusia telah memenuhi hukum; (Roma 13:8)

Begitulah Firman mendorong kita supaya tidak menjadi hamba kepada sesiapa melalui hutang. Selain itu, Allah mengatakan bahawa hutang ialah suatu kutukan (Ulangan 28:44,45) dan kemampuan untuk meminjamkan kepada orang lain adalah suatu berkat (Ulangan 28:11,12).

Namun begitu, kebanyakan orang perlu membuat pinjaman untuk membeli barang yang besar seperti kereta dan rumah. Prinsip pinjaman kita adalah pinjam seberapa sedikit yang mungkin dan melangsaikannya dengan secepat mungkin. Selain itu, jumlah yang dipinjam perlu dibayar kembali dengan konsisten mengikut perjanjian yang telah dibuat:

Janganlah menahan kebaikan daripada orang yang patut menerimanya, ketika engkau mampu melakukannya. Jangan katakan kepada sesamamu, "Pergilah dan kembalilah lagi, esok akan kuberi," padahal apa yang diminta itu ada padamu. (Amsal 3:27-28)

Pemulangan wang yang telah dipinjam mesti dibuat secara sistematik dan tersusun. Cara yang paling baik untuk mengeluarkan diri daripada jerat pelbagai hutang adalah dengan menggunakan cara yang terbukti berkesan, iaitu Kaedah *Snowball* (Compass 2014:19; Ramsey 2013:104-123).


Wang Sebagai Amanah Tuhan

Gunakan Kaedah *Snowball* untuk melangsai hutang dengan berkesan dan lebih cepat.

Langkah-langkah untuk kaedah ini adalah seperti berikut:

1. Anda mesti sudah mencapai Langkah 1 hingga 2, iaitu anda sedang menggunakan bajet yang seimbang, memberi dengan murah hati, menyimpan wang dengan konsisten dan memiliki tabung kecemasan yang pertama.
2. Bertekad untuk berhenti meminjam lagi.
3. Susun semua hutang anda daripada yang paling kecil kepada yang paling besar.
4. Berusaha membuat bayaran minimum untuk semua hutang anda dan fokus untuk melangsai hutang yang paling kecil dahulu.
5. Setelah anda telah melangsai hutang yang paling kecil, gunakan wang untuk membayar hutang yang paling kecil itu bersama-sama dengan jumlah yang telah anda gunakan untuk hutang kedua kecil untuk menokok tambah kepada bayaran hutang yang kedua kecil itu. Dengan cara ini, anda akan dapat melangsai hutang yang kedua kecil itu dengan lebih cepat.
6. Selepas itu, gunakan wang untuk langsai kedua-dua hutang tadi untuk membayar hutang yang ketiga kecil.
7. Teruskan proses ini, sehingga semua hutang sudah langsai kecuali hutang perumahan atau perniagaan yang agak besar.

Begitulah Kaedah *Snowball*. Anda perlu bijak, tabah dan berazam seperti kijang yang peka, kerana ini ialah soal hidup atau mati.



3.4 Langkah 4: Tetapkan

Syabas sekiranya anda telah mencapai hingga ke langkah 3. Anda sudah dan sedang mempraktikkan pemberian secara murah hati, mengikuti belanjawan yang sihat dan seimbang, menyimpan wang dengan konsisten, memiliki tabung kecemasan yang mencukupi bagi perbelanjaan 3-6 bulan dan semua hutang telah langsai.

Kini anda bersedia untuk mempertimbangkan dan menetapkan hal-hal jangka panjang yang penting seperti berikut:

- Kereta
- Rumah
- Insuran
- Pelaburan
- Pendidikan anak-anak

Wang Sebagai Amanah Tuhan

Jika anda perlu membeli sebuah kereta untuk kali yang pertama, carilah sebuah kereta yang telah digunakan sebelum ini atau dikenali sebagai kereta terpakai. Hal ini kerana kereta ialah aset yang akan jatuh nilainya dengan mendadak dan tidak mungkin naik semula. Jadi, asalkan kereta itu dapat berfungsi dengan baik dan tidak ada masalah serius, maka kereta jenis begitu sudah memadai.

Lantaran itu, anda akan dapat menyalurkan wang anda kepada aset lain yang lebih berbaloi seperti membeli rumah.

Untuk kereta pertama, beli kereta terpakai.

Kenderaan saya yang pertama dengan isteri ialah sebuah motosikal. Kami telah menggunakan motosikal tersebut untuk beberapa tahun sebelum kami membuat keputusan untuk membeli sebuah van untuk tujuan pelayanan. Maka, belilah kenderaan yang sesuai dengan keperluan bukan untuk menunjuk-nunjuk kepada orang lain dan apa yang paling penting adalah anda tidak terbeban untuk membayar kosnya.



Biasanya, pinjaman perumahan itu ialah hutang yang paling besar. Maka, pada langkah ini, anda perlu menggunakan semua wang yang pernah digunakan untuk melangsangkan hutang yang lain bagi mengurangkan hutang pinjaman perumahan ini.

Ingat bahawa, biasanya, untuk beberapa tahun yang pertama apabila anda membuat bayaran ansuran anda untuk mana-mana pinjaman, termasuk pinjaman perumahan, pada mulanya bayaran ansuran anda kebanyakannya melangsangkan bunganya dan bukan jumlah pokok (iaitu jumlah wang yang dipinjam). Jadi, simpan wang yang mencukupi untuk betul-betul dapat membayar balik jumlah pinjaman tersebut.

Pilih tempoh pinjaman perumahan yang paling pendek yang anda mampu bayar balik ansuran bulanannya dan jumlah yang paling minimum mengikut keperluan anda.

Jika anda membuat keputusan untuk membiayai semula pinjaman perumahan anda, pastikan pelan yang anda pilih adalah untuk jangka masa yang lebih pendek, dan tidak merugikan dari segi pembayaran keseluruhan, dengan mengambil kira bunga yang telah dibayar untuk pinjaman pertama, dan bunga yang akan dibayar untuk pinjaman pembiayaan semula itu.

Beli insuran hanya untuk perlindungan sahaja.

Wang Sebagai Amanah Tuhan

Apa pula dengan insuran? Insuran adalah untuk perlindungan keluarga anda. Jangan beli insuran untuk pelan menyimpan duit jangka panjang. Tidak mungkin ada pelan insuran yang baik untuk menyimpan duit. Selain itu, beli insuran seawal yang mungkin dalam kehidupan anda sebab bayarannya adalah lebih rendah untuk umur yang lebih muda dan sebaliknya jika semakin berusia.

Dalam hal pelaburan, anda mesti berhati-hati. Jangan ada sikap tamak haloba dalam hal pelaburan. Jika anda tidak mempunyai ilmu tentang pelaburan saham, maka cara yang paling selamat ialah meneliti dan mencari amanah saham yang memberi pemulangan yang baik dan konsisten untuk tiga hingga empat tahun berturut-turut. Kemudian melaburlah untuk jangka masa yang panjang.

Jangan pinjam duit untuk melabur kerana itu merupakan pengambilan risiko yang besar. Hanya melabur apa yang anda mampu rugi untuk mengelakkan keadaan yang genting.

Jangan pinjam wang untuk melabur.



Pendidikan anak-anak akan menjadi suatu isu setelah mereka tamat fasa persekolahan menengah mereka. Pada masa itu, keperluan kewangan untuk mereka untuk melanjutkan pelajaran ke institusi pengajian tinggi menjadi sangat genting.

Oleh sebab itu, sebagai ibu bapa anda perlu merancang untuk menghadapi situasi ini. Sekali lagi, menyimpan duit dengan konsisten untuk menghadapi keadaan ini adalah sangat penting.

Selain itu, anda perlu meninjau, berfikir dan berbincang dengan anak-anak anda tentang kursus apa dan tempat mana mereka akan melanjutkan pelajaran mereka. Cita-cita dan idaman mereka mestilah realistik dengan kemampuan ibu bapa.

Mula awal untuk menyimpan wang untuk pendidikan anak-anak anda. Hantar mereka ke institusi pendidikan yang anda mampu, bukan apa yang mereka idami.

Mengikut hemah saya, anak muda yang ingin belajar ke peringkat universiti atau politeknik bolehlah berbuat demikian di institusi tempatan. Ibu bapa tidak perlu menghantar anak-anak mereka jauh ke luar negara yang menelan perbelanjaan yang besar dan membebankan kecuali anak-anak mereka berjaya mendapat basiswa (bukan pinjaman).

Beberapa buah negara seperti Rusia, Jerman, Taiwan dan Cina memberi pendidikan tanpa yuran atau yuran yang rendah. Anda perlu menyelidiki tentang perkara ini bersama-sama dengan anak-anak anda dari segi perancangan dan sasaran pendidikan mereka.

Wang Sebagai Amanah Tuhan

Apabila anda membuat keputusan untuk menetapkan perkara-perkara jangka panjang seperti yang dibincangkan di atas, anda sebenarnya membuat keputusan untuk menjadi "lebih kaya" dan dalam situasi yang paling selamat.

3.5 Langkah 5: Bebas

Langkah kelima ini hanya dapat dicapai jika anda telah mengikuti cadangan yang telah diberikan untuk langkah satu hingga empat.

Harta kekayaan ialah benteng bagi orang kaya, tetapi kepapaan adalah kehancuran bagi orang miskin. (Amsal 10:15)

Kebebasan kewangan ialah tahap yang sangat seronok kerana anda bebas untuk melakukan apa yang anda ingin. Jika anda telah mengikuti rancangan yang telah disyorkan, anda akan mampu melabur 15% daripada pendapatan anda untuk fasa persaraan anda.

Anda akan dapat memberi dengan murah hati dengan jumlah yang lebih besar berbanding langkah-langkah yang lain.

Anda juga dapat berhibur dalam aktiviti-aktiviti yang menyeronokkan bagi anda dan keluarga anda.



Selain itu, anda juga dapat meninggalkan warisan yang sudah tentu akan membantu anak-anak anda pada masa mereka berada di langkah dua hingga empat kerana keadaan dunia sekarang menjadi semakin mencabar.



Nilai wang begitu kecil dan kebanyakan orang muda yang bergaji tidak mampu membeli aset yang penting seperti rumah atau pangsapuri terutamanya pada peringkat umur mereka.

Bantuan yang anda hulurkan kepada mereka untuk membeli aset-aset besar seperti ini adalah sesuai dengan Firman Tuhan:

Kini, bagi kali ketiga, aku bersedia mengunjungi kamu. Aku tidak akan membebani kamu, kerana aku menghendaki kamu, bukan hartamu. Tidaklah wajar anak-anak mengumpulkan harta untuk ibu bapa. Ibu bapalah yang patut mengumpulkan harta untuk anak-anak. Aku rela berbelanja malah berhabis untukmu. Oleh itu, jika kasihku semakin kulimpahkan kepadamu, wajarkah aku semakin kurang dikasih? (2 Korintus 12:14-15)

Rumah dan harta warisan nenek moyang...(Amsal 19:14a)

Wang Sebagai Amanah Tuhan

Penutup

Jiwa yang suka beramal jariah akan diberi kelimpahan, orang yang memberikan air kepada orang, dia sendiri akan diberi minum. Kutukan umum tertuju kepada sesiapa yang menyorokkan hasil ladang, tetapi keberkatan akan tercurah ke atas orang yang menjualnya. (Amsal 11:25-26)

Kekayaan atau kemiskinan tidak semestinya menunjukkan kehidupan yang suci atau perbenar. Tetapi sikap hati kita terhadap wang atau kekayaan ialah petunjuk yang ketara tentang ibadat dan komitmen kita kepada Allah. Jika kita mengasihi Allah, kita akan mengasihi manusia juga. Oleh sebab itu, jika kita suka beramal jariah, itulah ciri seorang yang suci dan perbenar. Jiwa yang sebegini akan diberkati Allah dan Dia akan memberi lebih banyak amanah dan kepercayaan kepada orang yang sedemikian di dalam dunia ini.

Selain itu, orang yang memberikan air kepada orang lain untuk menyegarkan mereka, akan disegar kembali dalam cara yang dia sendiri tidak menjangka. Jadi, jangan menyorokkan wang yang telah diamanahkan kepada kita. Gunakannya untuk kebaikan orang lain terutamanya orang yang miskin dan orang yang memerlukan Injil penyelamatan Kristus.

Maka, murid-murid Kristus mesti bekerja dengan gigih dan rajin untuk mendapatkan wang yang boleh digunakan untuk kebaikan. Jangan menjadi orang miskin kerana malas untuk berusaha, tetapi bekerja dengan penat lelah untuk mendapat keuntungan yang boleh diguna pakai untuk kerja Allah:

Segala penat lelah mendatangkan keuntungan, tetapi kata-kata kosong hanya mendatangkan kemiskinan. (Amsal 14:23)

Begitulah teladan rasul Paulus yang begitu giat berkecimpung dalam pelayanan misi sedunia. Namun begitu, dia bekerja dengan tangannya sendiri untuk menyara hidupnya dan orang-orang yang melayani bersama-sama dengannya. Walaupun Paulus begitu sibuk dengan kerja pelayanan, namun begitu dia tetap mencari nafkah untuk diri sendiri dan orang lain.

Aku tidak pernah ingin memiliki emas perak atau pakaian orang. Kamu tahu bahawa kedua-dua belah tanganku ini telah bekerja untuk mencukupkan sara hidupku dan orang yang bersamaku. Dalam semua perkara aku telah menunjukkan teladan kepadamu iaitu bagaimana kamu juga patut bekerja demikian untuk menolong orang yang lemah; dan ingatlah firman Tuhan Yesus, 'Memberi itu lebih berkatnya daripada menerima.' (Kisah Para Rasul 20:33-35)

Selain itu, kita mesti menjadi orang yang bertanggung jawab dan arif supaya kita tidak terjerat dalam masalah hutang. Hutang dapat dielakkan dengan perancangan yang baik dan penguasaan diri sendiri terhadap pembelian barang-barang. Pilih untuk hidup di bawah kemampuan kita dan berusaha untuk mengikut pelan ke arah kebebasan kewangan supaya anda tidak menjadi hamba kepada institusi kewangan tetapi menjadi hamba yang setia kepada Allah.

**Jadi hamba Allah yang setia
bukan hamba kepada institusi
kewangan atau sipiutang.**

Wang Sebagai Amanah Tuhan



Sehubungan dengan itu, kita mesti memastikan hati kita tidak tergoda oleh kekayaan dan tarikan dunia. Kita mesti selalu jujur dengan wang yang diamanahkan kepada kita dan jangan memperolehi wang melalui kaedah yang salah seperti menipu, menerima rasuah dan berbohong kerana itu ialah perbuatan yang keji di mata Allah:

Orang yang tamak akan laba haram menyusahkan rumah tangganya sendiri, tetapi orang yang membenci rasuah akan hidup. (Amsal 15:27)

Batu timbangan dan sukatan yang berbeza-beza, kedua-duanya kekejian bagi Tuhan. (Amsal 20:10)

Roti hasil tipu daya sedap rasanya bagi seseorang, tetapi kemudian mulutnya penuh dengan batu kerikil. (Amsal 20:17)

Batu timbangan yang berbeza-beza adalah kekejian bagi Tuhan, dan neraca tipuan tidaklah baik. (Amsal 20:23)

Harta yang diperoleh dengan lidah dusta seperti wap yang lenyap bagi orang yang mengejar maut. (Amsal 21:6)

Lebih baik orang miskin yang hidup dalam keikhlasan daripada orang bodoh yang kata-katanya penuh tipuan. (Amsal 19:1)

Selain itu, jangan menindas orang yang miskin tetapi bantulah mereka sejauh mana yang anda mampu:

Sesiapa menindas orang miskin untuk memperkaya diri atau memberikan hadiah kepada orang kaya, hanya akan menderita kemiskinan. (Amsal 22:16)

Orang yang menambah kekayaannya dengan wang faedah dan riba, mengumpulkannya bagi orang yang mengasihani orang miskin. (Amsal 28:8)

Jangan rompak orang miskin kerana dia tidak berdaya, dan jangan hancurkan orang yang tertindas di sidang pengadilan, kerana Tuhan akan membela perkara mereka, lalu merampas orang yang merampasi mereka. (Amsal 22:22-23)

Sesiapa mengasihani orang miskin memberikan pinjaman kepada Tuhan, dan Dia akan membala jasa baiknya itu. (Amsal 19:17)

Allah berpihak dengan mereka yang miskin dan jika anda membantu orang miskin jasa anda akan dikira sebagai pinjaman kepada Allah!

Berdoalah kepada Allah agar hati kita dididik oleh Roh Allah dan semoga kita bebas daripada cengkaman sikap yang mencintai kekayaan.

Jangan bersusah payah untuk menjadi kaya, jadilah bijaksana dan batalkan niat sedemikian. Jika kaupandang sekilas, kekayaan itu lenyap, kerana pasti akan bersayap lalu terbang ke langit seperti rajawali. (Amsal 23:4-5)

Wang Sebagai Amanah Tuhan

Biarlah kita menghargai kekayaan yang sejati iaitu perhubungan yang intim dengan Allah; perhubungan kasih dengan orang lain; kehidupan yang damai sejahtera; serta berpuas hati dengan apa yang telah diamanahkan kepada kita. Jadikanlah ini sebagai doa kita:

Jauhkanlah daripadaku kesia-siaan dan perkara dusta, janganlah beri aku kemiskinan atau kekayaan, berilah aku makanan secukupnya. Jangan sampai aku kenyang lalu menyangkal Engkau dan berkata, "Siapakah Tuhan itu?" Jangan sampai aku miskin lalu mencuri dan memfitnah nama Allahku. (Amsal 30:8-9)

Marilah kita mengamalkan sikap yang diseru oleh rasul Paulus:

Aku tidak bercakap disebabkan kekurangan, kerana dalam keadaan apa pun aku telah belajar berasa cukup. Aku tahu bagaimana hidup miskin hina dan bagaimana hidup mewah mulia. Di mana-mana dan dalam apa sahaja, aku telah belajar berasa cukup, baik kenyang atau lapar, senang atau susah. Aku dapat melakukan segalanya melalui Kristus yang memberiku kekuatan. (Filipi 4:11-13)

Seterusnya, kita akan dapat bersandar dan mempercayai Allah untuk segala keperluan kita:

Sebenarnya aku ada segalanya, bahkan berlebihan; sudah cukuplah bagiku, setelah menerima kirimanmu dari tangan Epafroditus, bau yang harum dan persembahan yang diterima serta direday Allah. Allahku akan membekalkan segala keperluanmu daripada kekayaan-Nya yang termulia dalam Kristus Yesus. (Filipi 4:18-19)

Marilah kita sentiasa berdoa seperti Tuhan Yesus telah mengajar kita, khususnya supaya kita tidak akan jatuh ke dalam godaan kekayaan, tetapi dapat bergantung kepada Allah yang selalu membekalkan segala keperluan kita:

Berdoalah demikian: 'Ya Bapa kami yang di syurga, sucilah nama-Mu. Datanglah kerajaan-Mu. Terlaksanalahkehendak-Mu di bumi sebagaimana di syurga. Berilah kami makanan untuk hari ini. Ampunkanlah kesalahan kami sebagaimana kami mengampuni mereka yang bersalah terhadap kami. Janganlah biarkan kami tergoda, tetapi selamatkanlah kami daripada yang jahat. Engkaulah yang empunya kerajaan, kekuasaan dan kemuliaan selama-lamanya. Amin.' (Matius 6:9-13)



Bibliografi

Compass (2014). *Navigating your finances God's Way*. Orlando, Florida: Compass - Finances God's Way Inc.

House, H. Wayne & Durham, Kenneth M. (1997). *Living wisely in a foolish world: A contemporary look at the wisdom of Proverbs*. Grand Rapids: Kregel Publications.

Ramset, David L. (2013). *The total money makeover*. Nashville, Tennessee: Thomas Nelson.

Jesus Film Project (20 Mei 2019). *Why does Jesus talk about money so often?* Diakses dari Jesus Film Project pada 19 Mei 2020.

<https://www.jesusfilm.org/blog-and-stories/jesus-talk-about-money.html>

Wealth With Purpose (19 Februari 2016). *Why does the Bible mention money so often?* Diakses dari Wealth With Purpose pada 19 Mei 2020.

<https://wealthwithpurpose.com/god-money/why-does-the-bible-mention-money-so-often/>

Ucapan Terima Kasih

Saya ingin mengucapkan terima kasih kepada semua orang yang telah membantu saya dalam Projek DamAI. Kerjasama dan perkongsian dalam misi ini sangat bermakna dan berharga kepada saya. Saya banyak belajar melalui pelaksanaan projek ini.

Saya juga ingin menghargai sumbangan isteri saya, Kwai Yok, dan anak buah saya, Noni Maki, yang telah membantu saya dalam penyuntingan isi kandungan buku-buku ini. Hanya Allah sahaja yang dapat memberkati anda untuk jerih payah anda.

Selain itu, saya ingin mengucapkan terima kasih kepada kawan saya, Albert Teh, yang menyokong kami sepanjang proses pelaksanaan Projek DamAI. Sokongan anda amat menggalakkan kami untuk meneruskan perjuangan ini demi kemuliaan Allah kita.

Kepada semua penaja Projek DamAI, saya ingin memuliakan Allah untuk sumbangan anda di dalam pelayanan Kerajaan Allah.

Saya juga ingin menghargai isteri kesayangan saya, Kwai Yok, yang selalu menyokong saya dan melayani bersama-sama saya. "I love you, dear! You are the love of my life."

Akhir sekali, saya tidak mungkin dapat melakukan semua ini tanpa kasih kurnia Allah. Segala syukur dan kemuliaan kepada Allah Bapa kita.

Wang Sebagai Amanah Tuhan

Buku-Buku Dalam Siri Projek DamAI

Siri Pemuridan Praktikal Projek DamAI

Jilid 1 - Kerja Sebagai Ibadat: Diperlengkapi untuk bekerja bersama-sama Allah

Jilid 2 - Wang Sebagai Amanah Tuhan: Ujian kepercayaan yang sangat penting

Jilid 3 - Perkahwinan Sebagai Pemuridan: Cara yang baik untuk menjadi pengikut Yesus

Jilid 4 - Keluarga Sebagai Pelayanan: Amanat terpenting daripada Allah kepada ibu bapa

Jilid 5 - Kepimpinan Sebagai Perhambaan: Cara menjadi yang terdahulu dalam Kerajaan Allah



Siri Asas Projek DamAI

Jilid 1 - Lahir Semula Dengan Sempurna: Langkah pertama dalam perjalanan rohani setiap insan

Jilid 2 - Berdiri Teguh: Mempertahankan iman dengan penuh keyakinan

Jilid 3 - Kehidupan Baharu (Perhubungan Yang Baharu): Keistimewaan kita sebagai ciptaan baharu Allah

Jilid 4 - Kehidupan Baharu (Perubahan Yang Baharu): Hakikat kita sebagai ciptaan baharu Allah

Jilid 5 - Kehidupan Baharu (Panggilan Yang Baharu): Amanat kita sebagai ciptaan baharu Allah



Siri Pemuridan Cekal Projek DamAI

Jilid 1 - Harapan dan Kedatangan Yesus Kali Kedua: Kehidupan yang tidak mungkin luntur

Jilid 2 - Iman dan Penderitaan: Kehidupan yang tidak mungkin undur

Jilid 3 - Kasih dan Realiti Syurga & Neraka: Kehidupan yang tidak mungkin gentar



Untuk maklumat tambahan, sila layari laman sesawang berikut: <http://projectbase.com.my>.

Wang Sebagai Amanah Tuhan

DamAI ialah singkatan untuk "Dalam Asas Iman." Projek DamAI ialah usaha membantu orang Kristian mendalami asas iman mereka supaya mereka yakin tentang apa yang mereka percaya, mampu mempertahankan iman mereka dan terus menjadi seorang murid Kristus yang setia sampai ke garis penamat.

Tuhan Yesus mengutus kita untuk menjadikan semua bangsa murid-Nya, bermula dengan diri kita sendiri. Kita tidak dapat menyampaikan sesuatu kepada orang lain apa yang kita sendiri tidak miliki. Maka, buku-buku Siri Projek DamAI ialah buku-buku untuk mendukung usaha Amanat Agung yang diberikan kepada umat Allah.

Sebagai penutup tirai, pertimbangkan harapan kita:

Janji terakhir dalam Alkitab:

**Yang bersaksi atas segala perkara ini berfirman,
"Ya, Aku akan datang segera." (Wahyu 22:20a)**

Doa terakhir dalam Alkitab:

**Sesungguhnya, marilah Engkau, ya Tuhan Yesus.
(Wahyu 22:20b)**

Keberkatan terakhir dalam Alkitab:

**Semoga kasih kurnia Tuhan Yesus menyertai
sekalian orang salih. Amin. (Wahyu 22:21)**



WANG SEBAGAI AMANAH TUHAN



Wang boleh digunakan sama ada untuk kebaikan atau keburukan. Jika kita menganggap wang sebagai hamba kita, wang boleh digunakan untuk membantu orang lain dan menyokong kerja Tuhan. Tetapi jika kita menganggap wang sebagai tuan kita dan hati kita mencintai wang, kehidupan kita akan dihancurkan oleh ketamakan, hutang atau jenayah yang berkaitan dengan wang. Maka, di dalam buku ini, anda akan belajar bagaimana untuk merancang dan menguruskan kewangan anda dengan baik untuk mencapai kebebasan kewangan berdasarkan prinsip-prinsip Alkitabiah. Jika anda runting tentang beban hutang, buku ini juga akan membantu anda untuk mengatasinya.



e ISBN 978-967-2802-28-0



Pastor Ng Kee Chuan mula mendapat seruan menjadi pastor semasa beliau masih berkhidmat sebagai pensyarah di salah sebuah institut pendidikan guru di Sabah, Malaysia. Kini setelah bersara, beliau masih meneruskan pelayanan sebagai pastor. Selain itu, beliau juga merupakan penyelia di salah sebuah asrama Kristian dan turut menjadi konsultan kepada beberapa buah sekolah swasta. Pastor Ng Kee Chuan turut dibantu oleh isterinya Puan Chow Kwai Yok dalam usaha giat mereka untuk melengkapkan para pengikut Kristian dalam aspek pemuridan.